
**AMATEGEKO SHINGIRO AVUGURUYE Y’IHURIRO RY’ABAGIZE INTEKO
ISHINGA AMATEGEKO NYAFURIKA BAHARANIRA KURWANYA RUSWA,
ISHAMI RY’U RWANDA (APNAC-RWANDA).**

IRANGASHINGIRO

Dushingiye ku Itegeko Nshinga rya Repubulika y’u Rwanda mu ngingo zaryo iya 10 mu gaka kayo ka (e) n’iya 39;

Dushingiye ku Itegeko Ngenga n° 007/2018.OL ryo ku wa 08/09/2018 rigenga imikorere ya Sena y’u Rwanda, mu ngingo yaryo ya 142;

Dushingiye ku Itegeko Ngenga n° 002/2024.OL ryo ku wa 12/07/2024 rigena imikorere y’Umutwe w’Abadepite, mu ngingo yaryo ya 211;

Dushingiye ku Itegeko Shingiro ry’ihuriro Nyafurika ry’abagize Inteko Ishinga Amategeko baharanira kurwanya ruswa, (APNAC) mu ngingo yaryo ya 4.0 igena ishyirwaho ry’Amashami ya APNAC mu bihugu by’Afurika;

Tumaze kubona intambwe u Rwanda rwateye mu gushyiraho politiki n’ingamba zo kurwanya ruswa zigamije imiyoborere myiza y’Igihugu;

Tumaze kubona ibyagezweho mu rwego rw’imiyoborere, icyerekezo cy’Igihugu mu myaka iri mbere, icy’Akarere u Rwanda ruherereyemo, icy’Afurika n’Isi muri rusange ku miyoborere irambye;

Tumaze kubona ko kurwanya ruswa mu Rwanda ari ngombwa kandi ko ari ikimenyetso gikomeye gishimangira imiyoborere myiza y’Igihugu;

Tumaze kubona ko imiyoborere myiza irimo kurwanya ruswa ari imwe mu nkingi ikomeye y’icyerekezo cy’u Rwanda, ishimangira gukorera mu mucyo, bityo buri wese akagira uburenganzira bungana n’ubw’undi imbere y’amategeko bimugeza ku nyungu ze;

Tumaze kubona uruhare rw’inzege za Leta, urw’imiryango mpuzamahanga, imiryango itari ya Leta n’iz’abikorera zigira mu guharanira iterambere rirambye muri rusange;

Twibukije umwanzuro w’Inteko Rusange y’Inteko Ishinga Amategeko y’u Rwanda wo ku wa 10 Kamena 2005, wemeje ishingwa ry’ihuriro Nyafurika ry’abagize inteko ishingwa amategeko baharanira kurwanya ruswa, ishami ry’u Rwanda;

Tuzirikanye uruhare rw’Ihuriro ry’Abagize Inteko Ishinga Amategeko y’u Rwanda baharanira kurwanya ruswa, ishami ry’u Rwanda mu ishyirwa mu bikorwa ry’inshingano z’Inteko Ishinga Amategeko;

Tumaze kubona ko ihuriro mu mikorere yaryo rigomba kuba isoko y'ibitekerezo bishya, umusemburo w'impinduka no gukora ubukangurambaga, hagamijwe kurushaho kunganira Inteko Ishinga Amategeko mu nshingano zayo;

Duteraniye mu nama y'Inteko Rusange yo ku wa 05/12/2024.

Twebwe, Abanyamuryango ba APNAC-Rwanda, twemeje ko Amategeko shingiro ya APNAC-RWANDA ahinduwe ku buryo bukurikira:

UMUTWE WA MBERE: ISHYIRWAHO, IZINA, ICYICARO, INTEGO BY'IHURIRO

INGINO YA MBERE: ICYO AYA MATEGEKO SHINGIRO AGAMIJE

Aya mategeko shingiro agena imiterere n'imikorere by'Ihuriro ry'Abagize Inteko Ishinga Amategeko Nyafurika baharanira kurwanya ruswa, ishami ry'u Rwanda.

INGINGO YA 2: ISHYIRWAHO N'IZINA

Hashyizweho Ihuriro ry' Abagize Inteko Ishinga Amategeko Nyafurika baharanira kurwanya ruswa, Ishami ry'u Rwanda. Rytwa "APNAC-RWANDA" mu magambo ahinnye y'Icyongereza.

INGINGO YA 3: ICYICARO CYA APNAC-RWANDA

Icyicaro cya APNAC-RWANDA kiri mu Ngoro y'Inteko Ishinga Amategeko, mu Mujyi wa Kigali, Umurwa Mukuru wa Repubilika y'u Rwanda.

INGINGO YA 4: INTEGO RUSANGE YA APNAC-RWANDA

APNAC-RWANDA igamije gutanga umusanzu mu gukumira no kurwanya ruswa hagamijwe iterambere ry'imoyoborere myiza izira ruswa.

INGINGO YA 5: INTEGO ZIHARIYE ZA APNAC-RWANDA

APNAC-RWANDA ibinyujije mu nshingano z'Inteko Ishinga Amategeko ifite intego zihariye zikurikira:

- (a) kuba isoko y'ibitekerezo bitanga impinduka ku kibazo cya ruswa hagamijwe iterambere ry'imiboborere myiza;
- (b) gukora ubukangurambaga ku nzego n'abaturage hagamijwe gufata ingamba zo gukemura ibibazo bijyanye n'imitangire ya serivisi idashyira umuturage kw'isonga;
- (c) kongerera ubushobozi abanyamuryango bayo mu bijyanye no gukumira no kurwanya ruswa mu rwego rwo kuzaza ishingano z'Inteko Ishinga Amategeko;

- (d) kungurana ibitekerezo no guhana amakuru n'izindi nzego z'Inteko zishinga Amategeko zo muri Afurika n'ahandi ku isi ku kibazo cya ruswa n'ibyo zimaze kugeraho;
- (e) kungurana ibitekerezo no guhana amakuru n'izindi nzego za Leta, imiryango itari iya Leta n'iz'abikorera bishinzwe kurwanya ruswa;

INGINGO YA 6: IGIHE APNAC RWANDA IZAMARA

Igihe APNAC RWANDA izamara ntikigenwe.

UMUTWE WA II: ABANYAMURYANGO BA APNAC-RWANDA

INGINGO YA 7: KUBA UMUNYAMURYANGO

- (1) Umunyamuryango wa APNAC-RWANDA ni Umudepite cyangwa Umusenateri ubisabye mu nyandiko, bikemezwa n'Inteko Rusange y'Ihuriro;
- (2) Iyo ari mu ntangiriro ya manda y'Umutwe w'Inteko Ishinga Amategeko, uwifuza kuba umunyamuryango wa APNAC RWANDA yandikira Perezida w'Umutwe w'Inteko Ishinga Amategeko abarizwamo. Iyo hashyizweho ubuyobozi bw'Ihuriro, uwifuza kuba Umunyamuryango yandikira Perezida w'ariyongere;
- (3) Ugize Inteko Ishinga Amategeko yiyandikisha muri APNAC-RWANDA agendeye kuri ibi bikurikira bifite aho bihuriye n'intego za APNAC RWANDA:
 - (a) ibimuraje ishingira;
 - (b) ubumenyi bwihariye;
 - (c) inararibonye;
 - (d) umwanya.
- (4) Biro ya buri Mutwe w'Inteko Ishinga Amategeko ikora urutonde rw'abawugize basabye kuba abanyamuryango ba APNAC RWANDA ikarushyikiriza Inteko Rusange yayo kugira ngo ibemeze.

INGINGO YA 8: UBURENGANZIRA BW'UMUNYAMURYANGO

Umunyamuryango wa APNAC-RWANDA afite uburenganzira bukurikira:

- (a) gutora cyangwa gutorwa mu nzego za APNAC-RWANDA hakurikijwe ibiteganywa n'iri tegeko shingiro;
- (b) kumenya no kumenyeshwa amakuru yose arebana na APNAC-RWANDA;
- (c) kugira uruhare mu bikorwa byose bya APNAC-RWANDA;
- (d) kureka kuba umunyamuryango wa APNAC-RWANDA.

INGINGO YA 9: KUREKA KUBA UMUNYAMURYANGO

Umuntu areka kuba umunyamuryango iyo:

- (a) aseze kuba umunyamuryango;
- (b) yeguye ku mirimo w'ugize Inteko Ishinga Amategeko;
- (c) manda y'abagize Umutwe w'Inteko Ishinga Amategeko abarizwamo irangiye;
- (d) apfuye.

INGINGO YA 10: INSHINGANO Z'UMUNYAMURYANGO

Umunyamuryango wa APNAC-RWANDA afite inshingano zikurikira:

- (a) kubahiriza amategeko agenga APNAC-RWANDA;
- (b) gutanga ibitekerezo bifasha APNAC-RWANDA kuba isoko y'ibitekerezo bishya byifashishwa n'Inteko Ishinga Amategeko mu mikorere yayo;
- (c) gufasha APNAC-RWANDA kuba umusemburo w'impinduka nziza, hagamijwe gushyira mu bikorwa intego zayo;
- (d) kugira uruhare mu bikorwa by'ubukangurambaga bifasha APNAC-RWANDA no guharanira icyariteza imbere;
- (e) kubaha no gushyira mu bikorwa ibyemezo bya APNAC-RWANDA;

UMUTWE WA III: IMITUNGANYIRIZE N'IMIKORERE BYA APNAC RWANDA

INGINGO YA 11: INZEGO Z'UBUYOBOZI ZA APNAC-RWANDA

Inzego z'ubuyobozi za APNAC-RWANDA ni izi zikurikira:

- (a) Inteko Rusange;
- (b) Komite Nshingwabikorwa.

Mu gushyira mu bikorwa inshingano zayo, APNAC-RWANDA ishyiraho Komisiyo tekini ishinzwe gukora igikorwa cyemejwe n'Inteko rusange igasoza imirimo yayo itanze raporo ku Nteko rusange.

ICYICIRO CYA MBERE: INTEGO RUSANGE

INGINGO YA 12: ABAGIZE INTEKO RUSANGE

Inteko Rusange Igizwe n'Abanyamuryango bose ba APNAC-RWANDA.

INGINGO YA 13: INSHINGANO Z'INTEKO RUSANGE

Inteko Rusange ya APNAC-RWANDA ni rwo rwego rukuru mu gufata ibyemezo, ifite inshingano zikurikira:

- (a) kwemeza abanyamuryango;
- (b) kwemeza no guhindura amategeko shingiro;
- (c) kwemeza gahunda y'ibikorwa by'umwaka n'ingengo y'imari yabyo;
- (d) kwemeza raporo y'ibikorwa by'umwaka;
- (e) gufata umwanzuro kuri raporo ya Komisiyo Tekiniki;
- (f) gutora no gusimbuza abagize inzego z'ubuyobozi.

INGINGO YA 14: ITERANA RY'INAMA Z'INTEKO RUSANGE N'IFATWA RY'IBYEMEZO

- (1) Inteko Rusange iterana mu nama isanzwe rimwe (1) mu mwaka. Ishobora kandi guterana mu nama idasanzwe igihe cyose bibaye ngombwa;
- (2) Haseguriwe ibiteganywa mu ngingo ya 7 y'aya mategeko shingiro, Inama y'Inteko Rusange itumizwa mu nyandiko kandi ikayoborwa na Perezida wa APNAC-RWANDA, iyo adahari igatumizwa na Visi Perezida, hasigaye nibura iminsi itanu (5) ngo iterane;
- (3) Kugira ngo Inteko Rusange ya APNAC RWANDA iterana mu buryo bwemewe n'amategeko, igomba guteranira mu Ngoro y'Inteko Ishanga Amategeko, inama yatumijwe, hari ibiri ku murorongo w'ibygwa, hari nibura bitatu bya gatanu (3/5) by'abanyamuryango;
- (4) Iyo umubare wa ngombwa uteganywa mu gika cya 3 cy'iyi ngingo utabonetse, inama y'Inteko Rusange itumizwa bwa kabiri (2) mu gihe kitarenze iminsi itanu (5) iyo ari inama isanzwe, no mu gihe kitarenze iminsi (3) iyo ari inama idasanzwe y'Inteko Rusange. Icyo gihe inama y'Inteko rusange iterana hatitawe ku mubare uteganywa mu gika cya gatatu (3);
- (5) Inteko Rusange ifata ibyemezo ku bwumvikane busesuye bw'abitabiriye inama. Iyo bidashobotse hakorwa itora, ibyemezo bigafatwa ku bwiganze burunduye bw'amajwi y'abagize Inteko Rusange bitabiriye inama;
- (6) Inama y'Inteko Rusange ikorerwa inyandikomvugo yemezwa n'Inteko Rusange mu nama yayo ikurikira. Icyo gihe umunyamuryango wese ushaka kugira icyo ayikosoraho ahabwa ijambo. Izo nyandiko zishyirwaho umukono n'umwanditsi wazo na Perezida wa APNAC-RWANDA.

INGINGO YA 15: ITUMIZWA RY'UNDI MUNTU MU NAMA Y'INTEKO RUSANGE

Inteko Rusange ishobora gutumira mu nama yayo umuntu wese ibona wayifasha kugera ku ntego za APNAC-RWANDA. Uwatumiwe muri ubwo buryo ntagira uruhare mu ifatwa ry'ibyemezo.

INGINGO YA 16: GUSABA IJAMBO MU NAMA Y'INTEKO RUSANGE

Umunyamuryango usabye ijambo mu nama y'Inteko Rusange arabihabwa. Umunyamuryango wifuza gufata ijambo mu nama y'Inteko Rusange abikora azamura ikiganza cyangwa akoresheje ubundi buryo.

ICYICIRO CYA 2: KOMITE NSHINGWABIKORWA YA APNAC-RWANDA

INGINGO YA 17: ABAGIZE KOMITE NSHINGWABIKORWA

1. Komite Nshingwabikorwa ya APNAC-RWANDA igizwe n'abanyamuryango batanu (5), batorwa n'abagize Inteko Rusange.
2. Komite Nshingwabikorwa ya APNAC-RWANDA igizwe na:
 - (a) Perezida, ari nawe Perezida wa APNAC-RWANDA;
 - (b) Visi Perezida;
 - (c) Abajyanama batatu (3).

INGINGO YA 18: ITORWA RY'ABAGIZE KOMITE NSHINGWABIKORWA YA APNAC-RWANDA

- (1) Umunyamuryango wifuza gutorerwa kuba umwe mu bagize Komite Nshingwabikorwa atanga kandidatire ye mu nama y'Inteko Rusange.
- (2) Umunyamuryango ashobora kwiyamamaza cyangwa kwamamazwa n'undi munyamuryango. Umukandida watanze n'undi munyamuryango abanza guhabwa umwanya wo kwemera cyangwa kutemera ubwo busabe.
- (3) Uretse Abajyanama batorerwa rimwe, buri mwanya w'ugize komite nshingwabikorwa ya APNAC-RWANDA utorerwa ukwawo.
- (4) Amatora yose akorwa ku bwiganze burunduye bw'amajwi y'abanyamuryango bitabiriye inama yabereyemo amatora. Iyo habayeho kungana kw'amajwi, hongera kuba irindi tora. Iyo, nyuma y'iryo tora, abakandida bakomeje kunganya, amatora yimurirwa ku yindi tariki.

INGINGO YA 19: UBURYO BUKORESHWA MU GUTORA ABAGIZE KOMITE NSHINGWABIKORWA

- (1) Uburyo bukoreshwa mu gutora abagize komite nshingwa bikorwa bugenwa n'Inteko Rusange.

- (2) Amatora y’abagize Komite Nshingwabikorwa agenzurwa na Biro y’Umutwe w’Inteko Ishinga Amategeko ureberera APNAC-RWANDA n’Abaseseri batatu (3) batorwa mu bagize APNAC-RWANDA batiyamamaje.

INGINGO YA 20: MANDA Y’ABAGIZE KOMITE NSHINGWABIKORWA

Abagize Komite Nshingwabikorwa ya APNAC-RWANDA batorerwa igihe cy’imyaka ibiri n’igice (2,5) ishobora kongerwa.

INGINGO YA 21: INSHINGANO ZA KOMITE NSHINGWABIKORWA

- (1) Komite Nshingwabikorwa ya APNAC-RWANDA ifite inshingano zikurikira:
- (a) gukurikirana ishyirwa mu bikorwa ry’itego za APNAC-RWANDA;
 - (b) kwemeza ishyirwaho rya Komisiyo tekini, kugena abayigize no kuyiha inshingano;
 - (c) gukurikirana no guhuza ibikorwa bya APNAC RWANDA;
 - (d) gutegura gahunda y’ibyigwa n’inama z’Inteko Rusange;
 - (e) gukurikirana ishyirwa mu bikorwa ry’ibyemezo by’Inteko Rusange;
 - (f) gufata ibyemezo byihutirwa biri mu bubasha bw’Inteko Rusange, mu gihe idashobora guterana;
 - (g) gutegura iteganyabikorwa ya APNAC-RWANDA no gukurikirana uko rishyirwa mu bikorwa;
 - (h) gutegura imbanzirizamushinga y’amategeko shingiro ya APNAC-RWANDA;
 - (i) gukorana n’izindi nzego bihuje inshingano haba mu Gihugu cyangwa mu mahanga;
 - (j) gukora indi nshingano yahabwa n’Inteko Rusange.

- (2) Ibyemezo bivugwa mu gika cya (1) (f) bigezwa mu Nteko Rusange mu nama yayo ikurikira ikabitafaho umwanzuro.

INGINGO YA 22: INSHINGANO ZA PEREZIDA WA APNAC-RWANDA

Perezida wa APNAC-RWANDA ashinzwe ibi bikurikira:

- (a) guhagararira APNAC-RWANDA no kuba umuvugizi wayo;
- (b) gutumira no kuyobora inama y’Inteko Rusange;
- (c) guhuza ibikorwa bya Komite Nshingwabikorwa, gutumira no kuyobora inama zayo;
- (d) kugenzura ko ibyemezo by’Inama Rusange n’ibya Komite Nshingwabikorwa bishyirwa mu bikorwa;
- (e) kugenzura ko itego za APNAC-RWANDA zishyirwa mu bikorwa igendeye ku igenamigambi;
- (f) gutegura no gukurikirana ibikorwa bya APNAC-RWANDA bigamije ubukanguramba;
- (g) kumenyakanisha ibikorwa ba APNAC-RWANDA;
- (h) gukora indi mirimo yose yahabwa n’Inteko Rusange cyangwa Komite Nshingwabikorwa.

INGINGO YA 23: INSHINGANO ZA VISI PEREZIDA

Visi Perezida wa APNAC-RWANDA afite inshingano zikurikira:

- (a) gusimbura Perezida wa APNAC-RWANDA mu gihe adahari;
- (b) gukurikirana ibikorwa bya Komisiyo tekini;
- (c) gutegura no guhuza ibikorwa by'ubushakashatsi;
- (d) gutegura gahunda zijyanye no kongerera ubushobozi abagize APNAC-RWANDA;
- (e) gukurikirana ibyerekeye itegurwa ry'inyandiko na raporo z'inama z'Inteko Rusange n'iza Komite Nshingwabikorwa;
- (f) gukurikirana itegurwa ry'iteganyabikorwa rya APNAC-RWANDA;
- (g) gukora indi nshingano yahabwa n'Inteko Rusange cyangwa Komite Nshingwabikorwa.

INGINGO YA 24: ITERANA RY'INAMA ZA KOMITE NSHINGWABIKORWA

Komite Nshingwabikorwa iterana rimwe (1) mu kwezi n'igihe cyose bibaye ngombwa. Komite Nshingwabikorwa ifite ububasha bwose ku birebana no gushyira mu bikorwa intego za APNAC-RWANDA n'ibyemezo by'Inama Rusange.

INGINGO YA 25: ABAKOZI BA APNAC-RWANDA

APNAC-RWANDA igira abakozi bayunganira, bashyirwaho hakurikijwe amategeko abigenga.

INGINGO YA 26: IBIGENERWA UMUNYAMURYANGO URI MU BIKORWA BYA APNAC-RWANDA

Ibikorwa abanyamuryango bakorera APNAC-RWANDA ntibihemberwa. icyakora, mu gihe abanyamuryango ba APNAC-RWANDA bari mu mirimo yayo cyangwa mu ngendo bagenerwa ibyangombwa bibafasha hakurikijwe amategeko abigenga.

UMUTWE WA IV: IMIKORERE YA APNAC-RWANDA

INGINGO YA 27: UBURYO BY'IMIKORERE.

Mu mikorere yayo, APNAC-RWANDA irangwa n'ibi bikurikira:

- (a) kuba isoko y'ibitekerezo bishya byifashishwa n'Inteko Ishinga Amategeko mu kumenya ibyuhoro biri mu mategeko, gutuma abanyamuryango bayigize babishingiraho mu gutegura imishinga y'amategeko, kugaragaza ibyuhoro biri mu iyubahirizwa ry'amategeko cyangwa mu gutuma inzego z'Inteko Ishinga Amategeko zibifitiye ububasha zishingira kuri raporo ya APNAC-RWANDA mu kurushaho kunoza inshingano yo kugenzura ibikorwa bya Guverinoma;

- (b) kuba umusemburo w'impinduka ugaragazwa n'uko abanyamuryango barangwa n'imyitwarire ntangarugero mu gushyira mu bikorwa intego za APNAC-RWANDA;
- (c) gukora ubukangurambaga bugamije impinduka ziri mu cyerekezo cya APNAC-RWANDA mu bagize Inteko Ishinga Amategeko, mu bafatanyabikorwa b'ihuriro no mu baturage.

INGINGO YA 28: GUHUZA IMIKORERE YA APNAC RWANDA N'INSHINGANO Z'INTEKO ISHINGA AMATEGEKO.

- (1) Gahunda y'ibikorwa y'umwaka (action plan) ishingira ku igenamigambi ry'igihe kirekire (Strategic Plan) rya buri Mutwe w'Inteko Ishinga Amategeko.
- (2) Mu gushyira mu bikorwa inshingano y'Inteko Ishinga Amategeko yo kujya impaka ku mategeko no kuyatora, APNAC-RWANDA ibikora mu buryo bukurikira:
 - (a) gutangiza umushinga w'itegeko mu gihe isanze ari bwo buryo bwakemura ikibazo cyagaragaye cyasuzumwe na APNAC-RWANDA;
 - (b) gutanga ibitekerezo ku mushinga w'itegeko washyikirijwe Inteko Ishinga Amategeko werekeye inshingano zayo;
 - (c) kumenyekanisha itegeko ryatangajwe ryerekeye intego za APNAC-RWANDA;
 - (d) gusesengura ishyirwa mu bikorwa ry'itegeko.
- (3) Kubyerekeye inshingano yo kugenzura ibikorwa bya Guverinoma:
 - (a) APNAC-RWANDA ibinyujije mu Banyamuryango bayo, ishobora gutangiza igikorwa cyo kugenzura ibikorwa bya Guverinoma, nyuma yo:
 - o gukora isesengura ryimbitse rya politiki ya Leta ifite aho ihurira n'intego zayo, igasanga hari ikibazo gikwiye gukurikiranwa;
 - o gukora isesengura rya raporo za Komisiyo z'Igihugu n'iz'Inzego zihariye zishyikirizwa Inteko Ishinga Amategeko, igasanga muri raporo hari ikibazo gifite aho guhurira n'intego zayo gikwiye gukomeza gukurikiranwa;
 - (b) ugize APNAC-RWANDA ashobora gusaba guhabwa amakuru ku kibazo kigezweho muri icyo gihe, mu gihe APNAC-RWANDA isesengura ingingo zijyanye n'intego zayo, igasanga hari amakuru agomba gutangwa n'ugize Guverinoma.
- (4) APNAC-RWANDA ifasha mu ishyirwa mu bikorwa ry'ibyo u Rwanda rwiyejeje ku rwego mpuzamahanga ikoresheje uburyo bukurikira:

- (a) gusesengura ibibazo bigaragara mu ishyirwa mu bikorwa ry'ibyo u Rwanda rwiyejeje;
 - (b) gukora ubukangurambaga aho bukenewe, hagamijwe gufasha kuzamura uruhare rw'inzego, abatwaga n'abafatanyabikorwa mu ishyirwa mu bikorwa ry'ibyo u Rwanda rwiyejeje.
- (5) Ku byerekeye iyubahirizwa ry'amahame remezo, APNAC-RWANDA iharanira iyubahirizwa ry'amahame remezo afite aho ahurira n'intego zayo mu buryo bukurikira:
- (a) gusesengura ibibazo bibangamiye amahame remezo ifite aho ihurira n'intego zayo;
 - (b) gukora ubukangurambaga ku iyubahirizwa ry'ihame remezo rijyanye n'intego zayo.

UMUTWE WA V: IMIKORANIRE YA APNAC-RWANDA N'IZINDI NZEGO

INGINGO YA 29: UMATWE UREBERERA APNAC-RWANDA

- (1) Ku bwumvikane bwa Biro z'Imitwe yombi y'Inteko Ishinga Amategeko, APNAC-RWANDA igira Umutwe w'Inteko Ishinga Amategeko uyireberera.
- (2) Umutwe w'Inteko Ishinga Amategeko ureberera APNAC-RWANDA, buri mwaka uteganya mu ngengo y'imari yawo amafaranga ugenera ibikorwa bya APNAC-RWANDA.
- (3) Umunyamabanga Mukuru w'Umutwe ureberera APNAC-RWANDA akora buri mwaka n'igihe cyose bibaye ngombwa, raporo y'imikoreshereze y'umutungo wa APNAC-RWANDA akayishyikiriza Perezida w'Umutwe ureberera APNAC-RWANDA, akagera kopi Perezida w'undi mutwe w'Inteko Ishinga Amategeko.

INGINGO YA 30: GUKURIKIRANA IMIKORERE YA APNAC-RWANDA

- (1) Biro z'Imitwe yombi y'Inteko Ishinga Amategeko zikurikirana imikorere ya APNAC-RWANDA zibinyujije kuri ba Visi Perezida mu Mitwe yombi y'Inteko Ishinga Amategeko bashinzwe amategeko no kugenzura ibikorwa bya Guverinoma.
- (2) Ba Visi Perezida b'Imitwe yombi y'Inteko Ishinga Amategeko bafite mu nshingano imikorere y'amahuriro na Perezida wa APNAC-RWANDA bafatanyaga kurebera hamwe iteganyabikorwa ryayo.

INGINGO YA 31: RAPORO Y'IBIKORWA BYA APNAC-RWANDA

- (1) Buri gihembwe n'igihe cyose bibaye ngombwa, APNAC-RWANDA ishyikiriza Perezida wa buri Mutwe w'Inteko Ishinga Amategeko gahunda na raporo y'ibikorwa byayo.
- (2) Iyo Perezida wa buri Mutwe w'Inteko Ishinga Amategeko yakiriye raporo y'ibikorwa ayishyikiriza abagize uwo Mutwe.
- (3) Mu gihe hari ibyo raporo y'ibikorwa yagaragaje bishobora gufatwaho icyemezo, Biro z'Imitwe yombi y'Inteko Ishinga Amategeko zumvikana ku gikwiye gukorwa.

INGINGO YA 32: ISHYIRWAHO RYA KOMISIYO TEKINIKE

- (1) Bisabwe na Komite Nshingwabikorwa, Inteko Rusange ya APNAC-RWANDA ishobora gushyiraho Komisiyo tekiniki ishinze gusuzuma ikibazo cyihariye gifite aho gihurira n'intego ya APNAC6RWANDA.
- (2) Abakandida muri Komisiyo tekiniki batangwa na Komite nshingwabikorwa bakemerezwa hamwe n'Inteko Rusange ku bwiganze burunduye bw'amajwi y'Abitabiriye inama.
- (3) Mu bagize Komisiyo tekiniki, Komite Nshingwabikorwa ishyikiriza Inteko Rusange abagize Biro y'iyi Komisiyo igizwe na Perezida na Visi Perezida bemezwa umwe ukwe n'undi ukwe n'Inteko Rusange ku bwiganze burunduye bw'amajwi y'Abitabiriye inama.

INGINGO YA 33: RAPORO YA KOMISIYO TEKINIKE YA APNAC-RWANDA

Nyuma y'igikorwa cya Komisiyo tekiniki, Perezida wa APNAC-RWANDA ashyikiriza raporo ba Perezida b'imitwe yombi y'Inteko Ishinga Amategeko. icyakora, iyo raporo igagaraza ikibazo gikwiye gukomeza gukurikiranwa n'izindi nzego z'Inteko Ishinga Amategeko, raporo ishyirikizwa Perezida w'Umutwe w'Inteko Ishinga Amategeko ufite inshingano zifite aho zihuriye n'igikorwa cya APNAC-RWANDA, Biro yawo igafata umwanzuro ku gikwiye gukorwa.

INGINGO YA 34: IMIKORANIRE YA APNAC-RWANDA N'ABAFATANYABIKORWA

- (1) Gahunda z'ibikorwa bya APNAC-RWANDA n'imikoranire yayo n'izindi nzego bikorwa hakurikije ibiteganywa n'itegeko Ngenga rigena imikorere ya Sena n'itegeko Ngenga rigena imikorere y'Umutwe w'Abadepite.
- (2) Mu bikorwa bya APNAC-RWANDA ishobora kwiyambaza abandi bagize Inteko Ishinga Amategeko batari abanyamuryango bayo.
- (3) APNAC-RWANDA ibinyujije kuri Perezida w'Umutwe w'Inteko Ishinga Amategeko uyireberera, ishobora gutumira mu nama yayo undi muntu ibona ko ashobora kuyunganira mu gikorwa irimo. Mu bikorwa byayo APNAC-RWANDA ishobora kandi kwifashisha impuguke.
- (4) Ubutumire bw'Umunyamuryango wa APNAC-RWANDA buturutse mu nzego za Leta n'abafatanyabikorwa bunyuzwa kuri Perezida w'Umutwe w'Inteko Ishinga Amategeko uyireberera.

UMUTWE WA VI: UMUTUNGO WA APNAC-RWANDA

INGINGO YA 35: INKOMOKO Y'UMUTUNGO WA APNAC-RWANDA

Umutungo wa APNAC-RWANDA ukomoka aha hakurikira:

- (a) Ingingo y'imari igenerwa n'Umutwe w'Inteko Ishinga amategeko uyireberera;
- (b) Ingingo y'imari itangwa n'umufatanyabikorwa.

INGINGO YA 36: IMICUNGIRE Y'UMUTUNGO WA APNAC-RWANDA

Umutungo wa APNAC-RWANDA ucungwa hakurikijwe amategeko agenga imicungire y'imari n'umutungo bya Leta.

UMUTWE WA VII: ISESWA RYA APNAC-RWANDA

INGINGO YA 37: ISESWA RYA APNAC-RWANDA

APNAC-RWANDA iseswa hakurikijwe ibiteganywa n'Itegeko Ngenga rigena imikorere ya buri Mutwe w'Inteko Ishinga Amategeko.

UMUTWE WA VIII: INGINGO ZISOZA

INGINGO YA 38: IVANWAHO RY'INGINGO ZINYURANYIJE N'AYA MATEGEKO-SHINGIRO

- (1) Ingingo zinyuranyije n'aya mategeko-shingiro zivanyweho.
- (2) Iyo hari ikibazo kireba APNAC-RWANDA kidateganyijwe n'aya mategeko shingiro cyangwa n'Itegeko Ngenga rigena imikorere ya buri Mutwe w'Inteko Ishinga Amategeko, Biro z'Imitwe yombi y'Inteko Ishinga Amategeko zumvikana ku buryo cyakemuka.

INGINGO YA 39: IGIHE AYA MATEGEKO SHINGIRO ATANGIRA GUKURIKIZWA

Aya mategeko-shingiro atangira gukurikizwa ku munsu yemerejweho n'Inteko Rusange ya APNAC-RWANDA.

Kigali, ku wa 05/12/2024